

摛藻堂四庫全書薈要

集部

欽定四庫全書叢要

集部

漢魏六朝百三家集卷七十七



詳校官候選知縣臣吳勣華

欽定四庫全書

集部

書會要卷一萬九千六百六十六

漢魏六朝百三家集卷七十七

明 張溥 輯

謝朓集

賦

酬德賦

有序

右衛沈侯以冠世偉才眷予以國士以建武二年予將
南牧見贈五言予時病既以不堪蒞職又不獲復詩四

年予忝役朱方又致一首迫東偏寇亂良無暇日其夏
還京師且事讌言未遑篇章之思沈侯之麗藻天逸固
難以報章且欲申之賦頌得盡其體物之旨詩不云乎
無言不酬無德不報言既未敢為酬然所報者寡于德
耳故稱之酬德賦其辭曰

嗟夫四游之代序六龍驚而不息輕蓋靡于駿奔玉
衡勞于拊翼嗟歲晏之渺歎曾陰默以悽惻元武伏於
重介究虹潛以自匿覽斯物之用舍相羣方之動植弔

悴軀於華省理衣簪而自敷思披文而信道散忿懣於
胸臆嗟民生之知用知莫深於知已彼知已之為深信
懷之其何已牽弱葛之蔓延寄陵風於松杞指曲蓬之
直達固有憑於原泉彼排虛與蹠實又相鳴於林沚興
伐木於爻生詠承筐於君子矧景行之在斯方寄言於
同心求相仁於積習寓神心于名理惟敦牂之旅歲實
興齊之二六奉武運之方昌覩休風之未淑龍樓儼而
洞開梁邸煥其重複君奉筆於帝儲我曳裾於皇穆藉

風雲之化景申遊好於蘭菊結德言而為佩帶芳猷而
為服援雅範以自綏懿前修之所勗昔仲宣之發穎實
中郎之倒屣及士衡之籍甚托壯武之高義有杞梓之
貞心協丹采之輝被伊吾人之陋薄雖黼藻之何寘惟
風雅之未變知雲綱之不廓譬層棟之將傾必華棟之
先落翳明離以上賓屬傳體於纖萼周二輝而分崩擠
九鼎於重壑雖魚鳥之欲安駭風川而迴薄微天道之
布新嗟員首其焉託予窘迹以多媿媿離尤而獨處君

紓組於名邦貽話言於川渚悵分手於東津望徂舟而
延佇慮古今之為隔豈山川之云阻賴先德之龍興奉
英靈之電舉事紫泥之密勿腰青綢而容與沾後惠以
竭來竟卒獲其笑語我艤舟以命徒將泊徂於南夏既
勗予以炯戒又引之以風雅若笙簧之在聽雖舒憂而
可假昔疚病於漳濱思繼歌而莫寫恩靈降之未已奉
京粉而作傳臨邦途之永陌懷予馬於騏駕望平津而
出宿登崇岡而興賦顧歸愾之南迴引行轡而東驅何

瓊才之博侈申贈辭於萱樹指代匠而切偲比治素而
引喻方含毫而報章迫紛埃之東驚釋末位以言歸忽
乘驛以南赴連篇章之莫訥欲寄言於往句類鍛翮之
難矯似洞源之不注意搔搔以抒軸魂營營而馳騖爾
腰戟於戎禁我拂劍於郎闈願同車以日夜城望昏而
掩扉時遊盤以未極睠落景之徂輝苦清顏之倏忽愴
歡賞之多違排重闕而休告知南館之有依驂職門以
右轉僕望路其如歸忘清漏之不緩惜曉露之方晞聞

夫君之東守地隱蓄而懷儂登金華以問道得石室之
名篇悟寰中之迫脅欲輕舉而舍旃離寵辱於毀譽去
天伐於腥膻忽攜手以上征躋中皇之修迴中帝車之
廣軾掉河舟之輕艇歷星術之熠燿浮天潢之灔溟機
九轉於玉漿練七明於神鼎吹萬化而不喧度千春之
可並齊天地於倏忽安事人間之紆婣哉

思歸賦有序

夫鑒之積也無厚而納窮神之照心之徑也有域而懷

重淵之深余少而薄遊身缺防方思俄然萬里晚而自省諒非一塗

余菲薄以固陋受靈恩而不訾施銀黃之沃若剖金符之陸離舟未濟而河廣途方遙而馬疲忽中寢而念厲魂申旦而九移昔受教於君子逢知己之隆盼被名立之羽儀沾宦成之藻絢羌服義而不怠豈臨歧而喻變勢方迅於轉圓理好旋於奔電援弱葛而能升踐重岡而不眩信禔福之非已寧悔禍其如見大明廓以高臨

吹萬忻而同悅跨神臯之沃衍奉英藩之睿哲承比屋
之隆化踵芳塵之餘烈懷醒覲之褊心無夸毗之誕節
竟伊鬱而不怡賴遐討於先哲紛吾生之遊蕩彌一紀
而歷茲自下車於江海涉青春於是時瞻崇岡而引領
望大廈而長思雖曲街之委陋猶寤寐而見之況神交
而通夢眇河漢於佳期爾乃眷言薄暮南眺悠然方整
歸轡願受一廛考華城之直陌相洛浦之迴阡連飛甍
於故交接閒館以懷儂臨南塲以藝藿寄北地而采蓮

睇微英之霏霏望水葉之田田乃翦山木不日為功非
輪非與去斲去礪夜索綯而繞繞旦乘屋而芃芃竹櫓
崎嶇而經北繩閑窈窕以臨東布菌蕭於疎襟纖炎亂
於迴櫳于是籬挿芳槿門拂長楊園挑春發窗竹夏涼
晨露晞而草馥微風起而樹香無芳菲以襲予空猗旎
於都房恒離居以歲月庸銷落而徒傷我聞時命有殖
無遷徵事或在求理未甄譬豐草之區別隨霜露而天
延背萱鮮於堂北尚幽幽而未捐苟外物以能惑亦在

應而無騫况朝霞之采可嚥瓊扉之飾方宣養以虛白
之氣悟以無生之篇豈加璧之贈可動執珪之位能纏
歸來薄暮聊以永年

遊後園賦

積芳兮選木幽蘭兮翠竹上蕪蕪兮蔭景下田田兮被
谷左蕙畹兮彌望右芝原兮寫目山霞起而削成水積
明以經復於是敞風閨之藹藹聳雲館之迢迢周步檐
以升降對玉堂之沈寥追夏德之方暮望秋清之始颯

藉宴私而遊衍時寤語而逍遙爾乃日棲榆柳霞照夕
陽孤蟬已散去鳥成行惠氣湛兮帷殿肅清陰起兮池
館涼陳象設兮以玉瑱紛蘭籍兮咀桂漿仰微塵兮美
無度奉英軌兮式如璋藉高文兮清談預含毫兮握芳
則觀海兮為富乃游聖兮知方

臨楚江賦

爰自山南薄暮江潭滔滔積水裊裊霜嵐憂與憂兮竟
無際客之行兮歲已嚴爾乃雲沉山岫風動中川馳波

鬱素駭浪浮天明沙宿莽石路相懸於是霧隱行鴈霜
眇虛林迢迢落景萬里生陰列攢笳兮極浦弭蘭鷁兮
江潯奉王鑄之未暮食勝賞之芳音願希光兮秋月庶
永照於遺簪

七夕賦

奉護軍
命作

金祇司矩火曜方流素鍾登御夷律鳴秋朱光既夕涼
雲始浮盈多露之藹藹升明月之悠悠步廣階而延睐
屬天媛之淹留嗟斯靈之淑景招好仇於服箱邁姮娥

而擢質凌瑤華而擅芳厭白玉以為飾霏丹霞而為裳
迴龍駕之容裔亂鳳筦之淒絳騰燭光於西極命二妃
於瀟湘軾帝車而捐袂凌天津而上翔悵漢渚之夕漲
忻河廣之既梁臨瑤席而宴語綿含睇而蛾揚嗟蘭夜
之難永泣會促而怨長忌纖阿之方駕客長庚之末光
撫鳴琴而修悅浩安歌而自傷歌曰清絃愴兮桂觴酬
雲幄靜兮香風浮龍鑣蹀兮玉鸞整睞星河兮不可留
分雙袂之一斷何四氣之可周斯乃嚮像恍惚彷彿幽

瞯耳之無聞目之無繢故鐘鼓間而延予隱白日沉而
季後對豈形氣之所求亦理將其如昧君王壯思風飛
沖情雲上顧楚詩而縱轡瞻蘭書而競爽實研精之多
暇聊餘日之駘蕩賦幽靈以去惑排視聽而玄往哂陽
雲於荆夢賦洛篇於陳想乃澄心而閑邪庶綱繆於茲
賞

擬風賦

奉司徒
故作

起日域而搖落集桂宮而送清開翠帳之影藹響行珮

之輕鳴揚淮南之妙舞發齊后之妍聲下鴻池而蓮散
上雀臺而雲生至於新虹明歲高月照秋暉儀乃豫沖
想雲浮鄒馬之賓咸至申穆之醴已酬朝後登樓之詠
夕引小山之謳厭朱邸之沉邃思輕舉而遠遊驅驕之
馬魚躍飄鑾車而水流此乃大王之盛風也若夫子雲
寂寞叔夜高張煙霞潤色荃蕙結芳出澗幽而泉列入
山戶而松涼渺神玉於丘壑獨起遠於孤觴斯則幽人
之風也

高松賦

奉竟陵
王教作

閱品物於幽記訪叢育於秘經巡汜林之彌望識斯松
之最靈提於巖以羣茂臨於水而宗生豈渝抑之比性
指冥椿而等齡若夫修榦垂蔭喬柯飛穎望肅肅而既
閒即微微而方靜懷風陰而送聲當月露而留影既芊
眠於廣隰亦迢遞於孤嶺集九儂之羽儀棲五鳳之光
景固總木之為選貫山川而自永爾乃青春受謝雲物
含明江臯綠草曖然已平紛弱葉而凝照競新藻而抽

英陵翠山其如剪施懸蘿而共輕至於星迴窮紀沙鴈
相飛同雲決其無色陽光沉而減暉卷風颺之歛吸積
霰雪之嚴霏豈彫貞於歲暮不受令於霜威若乃體同
器制質兼上才夏書稱其岱畎周篇咏其徂徠乃屈已
以弘用構大壯於雲臺幸為玩於君子留神心而顧懷
君王乃徙讌蘭室解佩明椒褰幽蘭於夕陰詠聳榦於
琴朝陵高丘以致思御風景而逍遙夷黻冕之隆貴懷
汾陽之寂寥邈道勝於千裸蘊神理而自超夫江海之

為大實涓澗之所歸瞻衡恒之峻極不讓壤於塵微嗟
孤陋之無取幸聞道於清微理弱羽於九萬愧不能兮
奮飛

杜若賦

奉隋王教
於坐獻

馮瑞圃而宣游臨水木而延佇柳含色於遠岸泉鏡流
於枉渚蔭綠竹以淹留藉幽蘭而容與覽茲榮之悅茂
紛為芳於清籞觀夫結根擢色發曜垂英緣春巒以纖
布蔭涼潭而影清景奕奕以四照枝靡靡而葉傾冒霜

蹊以獨行當春郊而逕平寧汀洲以企予懷石泉於幽
情嗟中巖之纖草廁金芝於芳叢夕舒榮於溽露旦發
彩於春風承羲陽之光景庶無悲於轉蓬

野鷺賦

有序

有門人斃一野鷺因以為獻予時命以登俎用待賓客
客有愛其羽毛請予為賦其詞曰

夫何羅人之伎巧薦江海之逸禽落摩天之迅羽絕歸
飛之好音碎文錦之丹臆裂雕綺之翠襟孤雛驚以靡

翼饑雌叫而莫尋越滄流以遠致乃交留以魚金因閭
竒以傳請排邃戶以重深貴敷祉以取愛願登俎以甘
心

表

為百官勸進齊明帝表

臣聞時乘在御必待先天之業神化為皇乃叶應期之
運况復湯孫有緒纂堯惟德舊邦併新復禹歸祉大齊
之權輿寶厯孕育前古昭假四海克酬三靈而嗣命疾

威蕃鄙叛渙委喪御寓契鼎如忽陛下文思體道徇齊
作聖翦應龍於冀州戮長蛇於沮水榮光之瑞昭回廷
喜之寶潤色天曄爰發人謀咸贊伏願陛下仰答靈祇
弘宣景命誕受多方奄宅萬國

為明帝讓封宣城公表

如其懸旌灞澨刷馬伊穀灑酒望屬車之塵整笏侍升
平之禮陛下訏謨玄覽欽若宏圖鑒臣匪躬共申彝訓
雖量能之請近遂微躬則弘長之風足軌來世

為明帝拜錄尚書表

升降王階拜揚休命六轡在手千里何偕司會天官之
統尚書百僚之本弘之則庶績惟凝替之則彞倫斯數
修身踐言本慙五美果行育德未階六正妄屬負圖之
寄多謝五仁之績操檜櫟於龍津荷梓梁於雲構無以
輔位明堂遺像麟閣

章

為宣城公拜章

惟天為大日星度其象謂地益厚河岳宣其氣斯冕旒
所以貞觀宸職所以代終慙下穆而上尊豈南征而北
怨何以克詠九歌載宣七德銘彼旂常勒斯鐘鼎

牋

辭隋王子隆牋

故吏文學謝朓死罪死罪即日被尚書召以朓補中軍
新安王記室參軍朓聞潢汙之水願朝宗而每竭鴛蹇
之乘希沃若而中疲何則臯壤搖落對之惆悵岐路東

西或以嗚唶况乃服義徒擁歸志莫從邈若墜雨翩似
秋華眺實庸流行能無算屬天地休明山川受納褒采
一介搜揚小善故得捨耒場圃奉筆免園東亂三江西
浮七澤契闊戎旃從容讌語長裾日曳後乘載脂榮立
府庭恩加顏色沐髮晞陽未測涯涘撫臆論報早誓肌
骨不悟滄溟未運波臣自蕩渤澥方春旅翮先謝清切
藩房寂寥舊草輕舟反溯弔影獨留白雲在天龍門不
見去德滋永思德滋深惟待青江可望候歸艎於春渚

朱邸方開效蓬心於秋實如其簪履或存衽席無改雖復身填溝壑猶望妻子知歸攬涕告辭悲來橫集不任犬馬之誠

啟

為王敬則謝會稽太守啟

臣本布衣不謀遠大折衝之勤不舉變理之義何階常恐覆餗是貽咎徵斯應陛下繼歷聖統日月重光得以桓珪衣服拜奉歲時視濯獻牲鞠躬郊廟而鴻恩妄假

覆授龜符玉節邁於雙璜表東侔於四履臨邊三事既
謝張溫潁川再撫亦慙黃霸

謝隨王賜左傳啟

昭晰殺青近發中汗恩勸挾策慈勗下帷眺未窺山笥
早懵河籍業謝專門說非章句庶得既困而學括羽瑩
其蒙心家藏賜書簋金遺其貽厥披覽神勝吟諷知厚

謝隨王賜紫梨啟

味出靈闕之陰旨珍玉津之澑豈徒真定歸美大谷慙

滋將恐帝臺妙棠安期靈棗不得孤擅王盤獨甘仙席
雖秦君傳器漢后推食望古可儔於今何答

教

為錄公拜揚州恩教

昔召南分陝流甘棠之德平陽好道深獄市之寄吾忝
屬負荷任總侯伯受餞元戎作牧中甸此地五都雜會
四方是則而向隅之矜斯積納隍之歎猶繁興念下車
無忘待旦有齊禮導德致之仁壽弘漏網之寬申在宥

之澤

為東海飼諸葛處士教

昔長孫東組降龍丘之節文舉北韜高通德之稱所以
激貪立懦式揚風範處士諸葛璩高風所漸結轍前修
宣懷珠被褐韜玉待價將幽貞獨往不事王侯者耶聞
事親有啜菽之寢就養寡藜蒸之給豈得獨享萬鍾而
忘茲五秉可餉穀百斛

哀策文

齊敬皇后哀策文

惟永泰元年秋九月朔日敬皇后梓宮啓自先塋將祔于興安陵其日至尊親奉奠明皇帝乃使僕太尉陳顯達設祖于行宮禮也翠帟舒阜玄堂啓扉俎徹三獻筵卷六衣哀子嗣皇帝懷蜃衛而延首想駕輶而撫心痛椒塗之先廓哀長信之莫臨身隔兩赴時無二展旋詔左言光敷聖善其辭曰

帝唐遠胄御龍遙緒在秦作劉在漢開楚肇惟淑聖克

柔克令清漢表靈曾沙膺慶爰定厥祥徽音允穆光華
治沚榮曜中谷敬始紜綻教先穜稑睿問川流神襟蘭
郁先德韜光君道方被于佐求賢在謁無諱顧史弘式
陳詩展義厚下曰仁藏往伊智十亂斯俟四教罔忒思
媚諸姑貽我嬪則化自公宮遠被南國軒曜懷光素舒
佇德閔予不祐慈訓早違方年沖藐懷袖靡依家臻寶
葉身嗣昌暉壽宮寂達清廟虛歸嗚呼哀哉帝遷明命
民神胥悅乾景外臨陰儀內缺空悲故劍徒嗟金穴璋

墳奚獻禕榆固設嗚呼哀哉馮相告祲宸駕長往貽厥
遠圖末命是獎懷豐沛之綱繆兮背神京之弘敞陋蒼
梧之不從兮導鮒隅以同壤嗚呼哀哉陳象設於園寢
兮映輿鋟於松楸望承明而不入兮度清洛而南游繼
池綺於通軌兮接龍帷于造舟迴塘寂其已暮兮東川
澹而不流嗚呼哀哉藉閟宮之遠烈兮聞績女之遐慶
始協德於蘋蘩兮終配祀而表命慕方纏於賜衣兮哀
日隆於撫鏡思寒泉之周極兮託彤管於遺詠嗚呼哀

哉

謚冊文

齊明皇帝謚冊文

維永泰元年九月朔日哀子嗣皇帝諱仰惟大行皇帝早棄萬邦聖烈方遠式遵一作尊帝世俾鬯鴻猷咸以為

無名以化則言繁莫宣其道有求斯應則影響庶圖其功所以永言配命寄心宗極光昭令德允樹風聲伏惟大行皇帝合信四時齊明日月創保大於登庸通神機

於受命因時以暢藉九萬而輕舉天保既定運四海而
高臨及迺開物成務重維國綱風行草化心往如神左
賢右戚內樂外禮輯五材以教民申三驅而在宥用能
盛德殷薦美善斯畢皇矣之業既孚蒸哉之道咸備景
化方遠厭世在天龜筮告期遠日無改仰則前王俯詢
百辟累德稱睿允極鴻名謹命某申奉太牢之奠謹上
尊謚曰明皇帝廟號高宗天人允協神其尚饗嗚呼哀
哉

墓銘

臨海公主墓銘

長發有祥瑤臺乃搆元鳥歸飛北音斯奏聿來徐土禎
符爰授帝體靈柯櫟華以秀飾館東魯言歸景族有教
公宮無繫車服既肅簪珥亦崇湯沐率禮衡門降情雲
屋彼月斯望在鈞維緝瞻須配景望燭齊神靈華崑岫
滅采上春慈纏雲陛悲動外姻撲鬱彼崇芒睂然城輦輜
翟按轡龍旒徐轉

新安長公主墓銘

氤氲長發時惟睿文誕茲明淑玉振蘭芬譽宣女師德
侔高行肅穆嬪風優游間正撫事成箴臨圖作鏡如何
冥默方春委盛

海陵王昭文墓銘

中樞誕聖膺歷受命於穆二祖天臨海鏡顯允世宗溫
文著性三善有聲四國無競嗣德方衰時惟介第景祚
云及多難攸啓載驅輶轄高闢代邸庶辟欣欣威儀濟

濟亦既負扆言觀帝則正位恭已臨朝淵嘿虔思寶締
負荷非克敬順天人高遜明德西光已謝東旭又涼龍
薰夕儼葆悅晨鏘風搖草色日照松光春秋非我晚夜
何長

鬻林王墓銘

綠車旛旛翠蕤掩映發貳戲良臨桃弛盛毀德歸桐葉
尊居鄭

祭文

祭大雷何周二神文

大過在運小雅盡缺瓊鏡日淪金車未晰周生電斷神
謨英冠正因部竒風歛雲散晉德如燬功資叶贊山無
猛鷙時曠忠賢流王于彘龜鼎忽焉忠肅布衣君親自
然驅狐上國斬鯢中川紛綸凱入氣氲配天

為隨王東耕文

穀躔星景穡表蜡先八政奚首六府茲宣弊嗟非國登
頌有年一夫或怠望歲誰天

為諸姊祭阮夫人文

婉婉嬪德幽閑嬾性耽史弘箴陳詩陳詠嘉言足題清
暉可映契潤未幾音塵如昨中景遽傾芳木先落疇昔
交觴享也虛薦帶上先結握中遺扇逆淚失聲潺湲如
霰

樂府

齊雩祭歌八首

南齊書樂志曰建武二年雩祭明堂
謝朓造辭一依謝莊唯世祖四言也

迎神 八章

清明暢禮樂新候龍景練貞辰

陽律亢陰晷伏耗下土薦種稑

宸儀警王度乾嗟雲漢望昊天

張盛樂奏雲儻集五精延帝祖

雩有諷禁有秩胥鬯芬圭瓚瑟

靈之來帝闈開車焜耀吹徘徊

停龍轡徧觀此凍雨飛祥雲靡

壇可臨奠可歆對畊社鑒皇心

武皇帝三章

濬哲維祖長發其武帝出自震重光御寓七德攸宣九疇咸叙靜難荆衡凝威蠶浦

昧旦丕承夕惕刑政化一車書德馨粢盛昭星夜景非雲曉慶衢室成陰璧水如鏡

禮充玉帛樂被匏絃於鑠在詠陟配於天自宮徂兆靡愛牲牷我將我享永祚豐年

青帝

三章

營翼日鳥殷宵凝冰泮元蟄昭

景陽陽風習習女夷歌東皇集

奠春酒秉青珪命田祖渥羣黎

赤帝

三章

惟此夏德德恢台兩龍在御炎精來

火景方中南譙秩靡草云黃含桃實

族雲翁鬱溫風扇興雨祁祁黍苗遍

黃帝 三章

稟火自高明毓金挺剛克涼燠資成化羣芳載厚德
陽季勻萌達炎徂溽暑融商幕百工止歲極凌陰沖
泉流疏已清原隰甸已平咸言祚惟億敦民保齊京

白帝 三章

帝說于兑報矩固司藏百川収潦精景應金方
嘉樹離披榆闕命賓鳥夜月如霜金風方嫋嫋
商陰肅殺萬寶咸已道勞哉望歲塲功莫可収

黑帝三章

白日短玄夜深招搖轉移太陰霜鐘鳴冥陵起星迴天

月窮紀

聽嚴風來不息望玄雲黝無色曾冰烈積羽幽飛雪至

天山側

闕梁閑方不巡合國吹饗蜡賓統微陽究終始百禮洽

萬祚臻

送神

五章

敬如在禮將周神之駕不少留

躍龍輶轉金蓋紛上馳雲之外

警七曜詔八神排闔闔渡天津

有渰興膚寸積雨冥冥又終夕

俾棲糧維萬箱皇情暢景命昌

隋王鼓吹曲十首

以下五言

齊永明八年謝朓奉鎮西隋王教於荊州道中作釣天以上三曲頌帝功校獵以上三曲

頌藩

元會曲

二儀啓昌歷三陽應慶期珪贊紛成序鞶譯憬來思分
階旆組練充庭羅翠旗觴流白日下吹溢景雲滋天儀
穆藻殿萬寓壽皇基

郊祀曲

六宗禋配岳五畤奠甘泉整蹕遊九闕清簫聞八挺鏘
鏘玉鑾動溶溶金障旋郊宮光已屬升柴禮既虔福響
靈之集南岳固斯年

釣天曲

高宴願天臺置酒迎風觀笙鏞禮百神鍾石動雲漢瑤
堂琴瑟驚綺席舞衣散威鳳來參差元鶴起凌亂已慶
明庭樂詎慙南風彈

入朝曲

江南佳麗地金陵帝王州逶迤帶綠水迢遞起朱樓飛
甍夾馳道垂楊蔭御溝凝笳翼高蓋疊鼓送華輶獻納
雲臺表功名良可收

出藩曲

雲枝紫微內分組承明阿飛艎遡極浦旌節去關河渺渺蒼山色沉沉寒水波鏡音已渝曲簫鼓盛唐歌夫君邁惟德江漢仰清和

校獵曲

凝霜冬十月殺盛涼颸哀原澤曠千里騰騎紛往來平丘望煙合烈火從風迴殪獸華容浦張樂荆山臺虞人昔有諭明明時戒哉

從戎曲

選旅辭轆軒弭節赴河源日起霜戈照風迴連騎翻紅塵朝夜合黃沙萬里昏寥戾清笳轉蕭條邊馬煩自勉輶耕願征役去何言

送遠曲

北梁辭歡宴南浦送佳人方衢控龍馬平路騁朱輪瓊筵妙舞絕桂席羽觴陳白雲丘陵遠山川時未因一為清吹激潺湲傷別巾

登山曲

卷之十七

天明開秀崿瀾光媚碧隄風盪飄鶯亂雲行芳樹低暮
春春服美遊駕凌丹梯升嶠既小魯登巒且悵齊王孫
尚遊衍蕙草正萋萋

泛水曲

玉露霑翠葉金風鳴素枝罷遊平樂苑泛鷁昆明池旌
旗散容裔簫管吹參差日晚厭導渚採菱贈清漪百年
如流水寸心寧共知

江上曲

易陽春草出踟蹰日已暮蓮葉尚田田淇水不可渡願
子淹桂舟時同千里路千里既相許桂舟復容與江上
可採菱清歌共南楚

蒲生行

蒲生廣湖邊託身洪波側春露惠我澤秋霜縕我色根
葉從風浪常恐不永植攝生各有命豈云智與力安得
遊雲上與爾同羽翼

詠邯鄲才人嫁為廝養卒婦

生平宮閣裏出入侍丹墀開筭方羅縠窺鏡比蛾眉初
別意未解去久日生悲憔悴不自識嬌羞餘故姿夢中
忽彷彿猶言承燕私

鼓吹曲二首同沈右率諸公賦

芳樹

早飄華池陰復影

一作鼓

滄洲柂椅杌芳若斯歲蕤紛可

結霜下桂枝銷怨與飛蓬折不廁玉盤滋誰憐終委絕

臨高臺

千里常思歸登臺臨綺翼纔見孤鳥還未辨連山極四
面動清風朝衣起寒色誰知倦遊者嗟此故鄉憶

同賦雜曲名

詩為宣城守擅秀才諸君同賦

秋竹曲

娟娟綺窗北結根未參差從風既裊裊映日頗離離欲
求棗下吹別有江南枝但能凌白雪貞心蔭曲池

曲池之水

緩步遵莓渚披衿待蕙風芙蓉舞輕帶苞荀出芳叢浮
雲自西北江海思無窮鳥去能傳響見我綠琴中

銅爵臺同謝諮議賦

總帷飄井榦樽酒若平生鬱鬱西陵樹詎聞歌吹聲芳
襟染淚迹嬋娟空復情玉座猶寂寞况乃妾身輕

永明樂十首

南齊書樂志曰永明樂歌者竟陵王子良與諸文士造奏之人為十曲

帝圖開九有皇風浮四溟永明一為樂咸池無復靈

民和禮樂富世清歌頌徽鴻名軼卷領稱首邁垂衣
朱臺鬱相望青槐分馳道秋雲湛甘露春風散芝草
龍樓日月照淄館風雲清儲光溫似玉藩度式如瓊
化洽鯤海君恩變龍庭長西北鶩環襄東南盡龜象
出車長洲苑選旅朝夕川絡絡結雲騎奕奕泛戈船
燕駟遊京洛趙服麗有輝清歌留上客妙舞送將歸
實相薄五禮妙花開六塵明祥已玉燭寶瑞亦金輪
生茂卉蘿性身與佳惠隆飛纓入華殿屣步出重宮

彩鳳鳴朝陽元鶴舞清商瑞此永明曲千載為金皇

有所思同王主簿賦

佳期期未歸望望下鳴機徘徊東陌上月出行人稀

銅雀悲

落日高城上餘光入總帷寂寂深松晚寧知琴瑟悲

玉階怨

夕殿下珠簾流螢飛復息長夜縫羅衣思君此何極

金谷聚

渠碗送佳人玉杯邀

玉臺作要

上客車馬一東西別後思今

夕

王孫遊

綠草蔓如絲雜樹紅英發無論君不歸君歸芳已歇

詩

侍宴華光殿曲水奉勅為皇太子作

四言九章

旁求邃古逖聽鴻名大寶曰位得一為貞朱梯叶祉綠
字搞英升配同貫進讓殊聲

大橫將屬會昌已命國步中徂宸居膺慶璽劒先傳龜
玉增映宗堯有緒復禹無競

禮行郊社人神受職寶效山川鱗羽變色玄塞北靡丹
徼南極浮毳駕風飛泳登陟

能官民秀利建天跗崿鶴列野營絳分區論思帝則獻
納宸樞麟趾方定鶴翼誰濡

西京謁謁東都濟濟秋祓濯流春禊浮醴初吉云獻上
陰方啓昔駕陽賴今帳雲陞

嘉樂舊矣芳宴在斯載留神矚有醉天儀龍精已映威
仰未移葉依黃鳥花落春池

高殿弘敞禁林稠密青磴起丹樓間出翠葆隨風金
戈動日惆悵清管徘徊輕佾

灞灌入筵河淇流阼海若來往觴肴訖歡飫有終清
光欲暮輕貂回首華組徐步

登賢博望獻賦清漳漢貳稱敏魏兩垂芳監撫有則七
鬯無方瞻言守器永槐元良

三日侍華光殿曲水宴代人應詔

十章

羣分未辨類聚茲式天曇休明且求至德御繁實簡制
動惟默官府百王衣裳萬國

中葉遭閔副內多違悠悠靈貺爰有適歸於昭睿后撫
運天飛凝居中縣神動外畿

懸象著明離光乃位我有儲德徽猷淵備長壽察書龍
樓迴轡重道上庠行遵儒肆

朝陽有幹布蕢萋萋思皇威矣鷁羽高棲出馳先輶入

秉介珪瞻秦望井建魯分奎

求賢每勞得士方逆有覺斯順無文咸秩萬箱惟重百

鋟載卹屈草戒訛階萱紀日

文教已肅武節既馳榮光可照合璧如規載懷姑射尚
想瑤池濯龍乃飾天淵在斯

作樂順動實符時義上春初吉亦留淵寄紅樹巖舒青
莎水被雕梁虹拖雲甍鳥跂

高懸甲帳周褰黼帷長筵列陞激水旋墀浮醪聚蟻靈

蔡呈姿河宗躍踢海介夔跪

弱腕纖腰遷延妙舞秦箏趙瑟殷勤促柱降席連綾稱
觴接武稽首萬年獻茲多祐

天地既成泉流既清薄暮沾幸屬奉文明將標齊配刻
掃秦京願馳龍漠飲馬懸旌

三日侍宴曲水代人應詔

九章

神理內寂機象外融遺情汾水垂冕鴻宮樹以司牧匪
我求蒙徒勤日用誰契玄功

往晦必明來碩資蹇於皇克聖時乘御辭寶歷載暉瑤
光重踐昭昭舊物熙熙遷善

當寧日昃求衣未明抵璧焚翠銷劒隳城九疇式序三
辟載清虞箴罔闕矇奏傳聲

麗景則春儀方在震重聖積厚金式瓊潤天爵必諧王
臣咸盡譬諸華霍惟邦之鎮

正朔葱翰冠冕卽越爭長明堂相超魏闕龜蒙南薦環
襄西發巢閣易窺馴庭難戒

上已惟昔于彼禊流祓穢河濱張樂春疇既停龍駕亦泛鳬舟靈宮備矣無待茲遊

初鸚命曉朝霞開夜飾陞道源迴伊流灞極望天淵曲
阻亭榭間館巖敞長廊水架

金觴搖蕩玉俎推移筵浮水豹席擾雲螭寥亮琴瑟嗷
咷埙篪歡茲廣謙穆穆天儀

周道如砥康衢載直徒愧元黃負恩無力華輜徒駕長
纓未飾相彼失晨寧忘鼓翼

遊山

以下
五言

託養因支離乘閒遂疲蹇語默良未尋得喪云誰辯幸
蒞山水都復值清冬緬凌厓必千仞尋壑將萬轉堅崿
既峻嶒迴流復宛澶杳杳雲竇深淵淵石濁淺傍眺鬱
篋笏還望森柂梗荒隩被歲莎崩壁帶苔蘚鼯狹叫層
崕鷗鳬戲沙衍觸賞聊自觀即趣咸已展經目惜所遇
前路欣方踐無言蕙草歇留垣芳可攀尚子時未歸邴
生恩自免永志昔所欽勝迹今能選寄言賞心客得性

良為善

遊敬亭山

茲山亘百里合沓與雲齊隱淪既已託靈異居然樓上
千蔽白日下屬帶迴谿交藤荒且蔓穆枝聳復低獨鶴
方朝唳飢鼯此夜啼漂雲已漫漫夕雨亦淒淒我行雖
紆組兼得尋幽蹊緣源殊未極歸徑窅如迷要欲追奇
趣即此凌丹梯皇恩竟已矣茲理庶無睽

將遊湘水尋句溪

既從陵陽釣挂鱗駢赤螭方尋桂水源謁帝蒼山垂辰
哉且未會乘景弄清漪瑟汨瀉長淀潺湲赴兩歧輕蕩
上靡靡雜石下離離寒草分花映戲鮪乘空移興以暮
秋月清霜落素枝魚鳥余方翫纓綾君自靡及茲暢懷
抱山川長若斯

遊東田

戚戚苦無悰攜手共行樂尋雲陟累榭隨山望菌閣遠
樹曖阡阡生煙紛漠漠魚戲新荷動鳥散餘花落不對

芳春酒還望青山郭

答王世子

飛雪天山來飄聚繩櫓外蒼雲暗九重北風吹萬籟有
酒招親朋思與清顏會熊席惟爾安羔裘豈吾帶公子
不垂堂誰肯憐蕭父

答張齊興

荆山從百里漢廣流無極北馳星斗正南望朝雲色川
隰同幽快冠冕異今昔子肅兩岐功我滯三冬職誰知

京洛念彷彿昆山側向夕登城濠潛池隱復直地迴間
遙蟬天長望歸翼清文忽景麗思泉紛寶飾勿言修路
阻勉予康衢力曾厓寂且寥歸軫逝言陟

暫使下都夜發新林至京邑贈西府同僚

大江流日夜客心悲未央徒念闕山近終知返路長秋
河曙耿耿寒渚夜蒼蒼引領見京室宮雉正相望金波
麗鷁鵠玉繩低建章驅車鼎門外思見昭丘陽馳暉不
可接何況隔兩鄉風雲有鳥路江漢限無梁常恐鷹隼

擊時菊委嚴霜寄言劖羅者寥廓已高翔

酬王晉安德元

稍稍枝早勁塗塗露晚晞南中榮摘抽寧知鴻鴈飛拂
霧朝青閣日旰坐形闈悵望一途阻參差百慮依春草
秋更綠公子未西歸誰能久京洛縗塵染素衣

郡內高齋閒望答呂法曹

結構何迢遞曠望極高深牕中列遠岫庭際俯喬林日
出衆鳥散山暝孤猿吟已有池上酌復此風中琴非君

美無度孰為勞寸心患而能好我問以瑤華音若遺金
門步見就玉山岑

在郡卧病呈沈尚書

淮陽股肱守高卧猶在茲况復南山曲何異幽棲時連
陰盛農節薹笠聚東菑高閣常晝掩荒堦少諍辭珍簟
清夏室輕扇動涼颸嘉鯈聊可薦綠蟻方獨持夏李沈
朱實秋蘡折輕絲良辰竟何許夙昔夢佳期坐嘯徒可
積為邦歲已朞弦歌終莫取撫枕令自嗤

別王丞僧孺

首夏實清和餘春滿郊甸花樹雜為錦月池皎如練如
何當此時別離言與宴留雜已鬱紆行舟亦遙行非君
不見思所悲思不見

同羈夜集

積念隔炎涼驟言始今夕已對濁尊酒復此故鄉客霜
月始流砌寒蛸早吟隙幸藉京華遊邊城讌良席樵采
咸共同荆莎聊可藉恐君城闕人安能久松柏

新亭渚別范零陵雲

洞庭張樂地瀟湘帝子遊雲去蒼梧野水還江漢流停
駿我悵望輶棹子夷猶廣平聽方籍茂陵將見求心事
俱已矣江上徒離憂

忝役湘州與宣城吏民別

弱齡倦簪屨薄晚忝華輿閒沃盡地區山泉諧所好幸
遇昌化穆淳俗罕驚暴四時從偃息三省無侵冒下車
遽暄席紝服始點竈榮辱未遑敷德禮何由導汨徂奉

南岳兼秩典邦號疲馬方云驅鉛刀安可操遺惠良寂
冥恩靈亦匪報桂水日悠悠結言幸相勞吐納貽爾和
窮通最所蹈

懷故人

芳洲有杜若可以贈佳期望望忽超遠何由見所思行
行未千里山川已間之離居方歲月故人不在茲清風
動簾夜孤月照牕時安得同攜手酌酒賦新詩

始之宣城郡

下帷閱章句高談媿名理疎散謝公卿蕭條依掾史簪
髮逢嘉惠教義承君子心迹苦未并憂歡將十祀幸沾
雲雨慶方轡參多士振鷺徒追飛羣龍難隸齒烹鮮止
貪競共治屬庶心伊余昧損益何用祗千里解劍北宮
朝息駕南川涉寧希廣平詠聊慕華陰市棄置究洛遊
多謝金門裏招招漾輕楫行行趨巖趾江海雖未從山
林於此始

之宣城郡出新林浦向板橋

江路西南永歸流東北驚天際識歸舟雲中辨江樹旅
思倦搖搖孤遊昔已屢既歡懷祿情復協滄洲趣囂塵
自茲隔賞心於此遇雖無元豹姿終隱南山霧

休沐重還丹陽道中

薄遊第從告思閒願罷歸還印歌賦似休汝車騎非瀟
池不可別伊川難重違汀葭稍靡靡江菼復依依田鶴
遠相叫沙鵝忽爭飛雲端楚山見林表吳岫微試與征
徒望鄉淚盡沾衣賴此盈樽酌含景望芳菲問我勞何

事需沐仰清徽志狹輕軒冕恩甚戀閨闥歲華春有酒

初服偃郊扉

京路夜發

擾擾整夜裝肅肅戒徂兩曉星正寥落晨光復滌滌猶沾餘露團稍見朝霞上故鄉邈已夐山川修且廣文奏方盈前懷人去心賞敷躬每跼蹐瞻恩惟震蕩行矣倦路長無由稅歸鞅

晚登三山還望京邑

灞涘望長安河陽視京縣白日麗飛甍參差皆可見餘
霞散成綺澄江靜如練喧鳥覆春洲雜英滿芳甸去矣
方滯淫懷哉罷歡宴佳期悵何許淚下如流霰有情知
望鄉誰能鬢不變

始出尚書省

惟昔逢休明十載朝雲陛既通金闕籍復酌瓊筵醴宸
景獻昭臨昏風淪繼體紛虹亂朝日濁河穢清濟防口
猶寬政餐荼更如薺英袞暢人謀文明固天啓青精翼

紫軒黃旗映朱邸還覩司隸章復見東都禮中區咸已

泰輕生諒昭洒

音趨

事辭宮闈載筆陪旌棨邑里向疎

蕪寒流自清泚衰柳尚沈沈凝露方泥泥零落悲友朋

歡娛燕兄弟既秉丹石心寧流素絲涕因此得蕭散垂

竿深澗底

直中書省

紫殿肅陰陰彤庭赫弘敞風動萬年枝日華承露掌玲瓏結綺錢深沉映朱網紅藥當階蘢蒼苔依砌上茲言

翔鳳池鳴佩多清響信美非吾室中園思偃仰朋情以
鬱陶春物方駘蕩安得凌風翰聊恣山泉賞

觀朝雨

朔風吹飛雨蕭條江上來既灑百常觀復集九成臺空
濛如薄霧散漫似輕埃平明振衣坐重門猶未開耳目
暫無擾懷古信悠哉戢翼希驤首乘流畏曝鰐動息無
兼遂歧路多徘徊方同戰勝者去剪北山菜

宣城郡內登望

借問下車日匪直望舒圓寒城一以眺平楚正蒼然山
積陵陽阻溪流春縠泉威紆距遙甸嶧嵒帶遠天切切
陰風暮桑柘起寒烟悵望心已極惝恍悅魂屢遷結髮倦
為旅平生早事邊誰規鼎食盛寧要狐白鮮方棄汝南
諾言稅遼東田

冬日晚郡事隙

案牘時間暇偶坐觀卉木颯颯滿池荷脩脩蔭牕竹簷
隙自周流房櫳間且肅蒼翠望寒山崢嶸瞰平陸已惕

慕歸心復傷千里目風霜旦夕甚蕙草無芬馥云誰美
笙簧孰是厭邁軸願言稅逸駕臨潭餌秋菊

高齋視事

餘雪映青山寒霧開白日曖曖江村見離離海樹出披
衣就清盥憑軒方秉筆列俎歸單味連駕止容膝空為
大國憂紛詭諒非一安得掃荒逕鎖吾愁與疾

冬緒羈懷示蕭詔議虞田曹劉江二常侍

去國懷丘園入遠滯城闕寒燈耿宵夢清鏡悲曉髮風

草不留霜冰池共如月寂寞此間惟琴尊任所對客念
坐嬋媛年華稍菴夢夙慕雲澤遊共奉荆臺績一聽春
鶯喧再視秋鴻沒疲驂良易返恩波不可越誰慕臨淄
鼎常希茂陵渴依隱幸自從求心果蕪昧方軫歸與願
故山芝未歇

落日悵望

昧旦多紛喧日晏未遑舍落日餘清陰高枕東牕下寒
槐漸如束秋菊行當把借問此何時涼風懷朔馬已傷

暮歸客復思離居者情嗜幸非多案牘偏為寡既乏郎

琊政方憩洛陽社

賽敬亭山廟喜雨

夕悵懷椒糈蠲景潔臂鄉登秋雖未獻望歲佇年祥潭
淵深可厲狹邪車未方朦朧度絕限出沒見林堂秉玉
朝羣帝樽桂迎東皇排雲接虬蓋蔽日下覽裳會舞紛
瑤席安歌遠鳳梁百味芬綺帳四座沾羽觴福被延民
澤樂極思故鄉登山騁歸望原雨晦茫茫胡寧昧千里

解珮拂山莊

賦貧民田

假遇

一作佳譽

非將迎靖共

一作靜拱

延殊慶中歲歷三臺旬月

典邦政曾是共治情敢忘卹貧病將無富教禮孰有知

方性敦本抑工商均業省兼併察壞見泉脈覘星視農

正黍稷緣高殖獨稌即卑盛舊埒新塍分青苗白水映

遙樹匝清陰連山周遠淨即此風雲佳孤觴聊可命既

微三載道庶藉兩岐詠俾爾倉廩實余從谷口鄭

移病還園示親屬

疲策倦人世，斂性就幽蓬。停琴佇涼月，滅燭聽歸鴻。涼薰乘暮暉，秋華臨夜空。葉低知露密，崖斷識雲重。折荷葺寒袂，開鏡眄衰容。海暮騰清氣，河闢祕棲冲。煙衡時未歇，芝蘭去相從。

治宅

結宇夕陰街，荒幽橫九曲。迢遞南川陽，迤連西山足。閨館臨秋風，敞牕望寒旭。風碎池中荷，霜翦江南菉。既無

東都金且稅東臯栗

秋夜講解

四緣去誰肇七識習未央沈沈倒營魄苦蔭蹙愁腸琴
瑟徒爛熳姱容空滿堂春顏遽幾日秋壘終茫茫孰云
濟沈溺假願託津梁惠唱搞泉湧妙演發金相空有定
無執賓實固相忘自來乘首夏及此申暮霜雲物清晨
景衣巾引夕涼風振蕉蓬裂露下梧楸傷六龍且無借
三相寧久長何時接靈應及子同舟航

春思

如谿發春水陟山起朝日蘭色望已同萍際轉如一巢
燕聲上下黃鳥弄儔兀邊郊阻遊衍故人盈契澗夢寐
借假簧思歸賴倚瑟幽念漸鬱陶山楹永為室

秋夜

秋夜促織鳴南鄰搗衣急思君隔九重夜夜空佇立北
牕輕幔垂西戶月光入何知白露下坐視階前濕誰能
長分居秋盡冬復及

和何議曹郊遊二首

春心澹容與挾戈步中林朝光映紅萼微風吹好音江
垂得清賞山際果幽尋未嘗遠離別知此愜歸心流泝
終靡已嗟行方至今

江皋倦遊客薄暮懷歸者揚舲浮大川惆悵至日下靄
靡青莎被潺湲石溜瀉寄語持笙簧舒憂願自假歸途
豈難涉翻同江上夏

和劉西曹望海臺

滄波不可望望極與天平往往孤山映處處春雲生差
池遠鴈沒颯沓羣鳬驚囂廬及簿領棄捨出重城臨川
徒可美結網庶時營

和宋記室省中

落日飛鳥遠憂來不可極竹樹澄遠陰雲霞成異色懷
歸欲乘電瞻言思解翼清揚婉禁居秘此文墨職無歎
阻琴樽相從伊水側

和王著作融八公山

二別阻漢坻雙嶠望河渢茲嶺復躋屹分區奠淮服東
限邛鄒臺西距孟諸陸阡眠起雜樹檀欒蔭修竹日隱
澗疑空雲聚岫如複出沒眺樓雉遠近送春目戎州昔
亂華素景淪伊穀阽危賴宗袞微管寄明牧長蛇固能
翦奔鯨自此曝道峻芳塵流葉遙年運倏平生仰令圖
吁嗟命不淑浩蕩別親知連翩戒征軸再遠館娃宮兩
去河陽谷風煙四時犯霜雨朝夜沫春秀良已凋秋場
庶能築

和伏武昌登孫權故城

伏曼容為
武昌太守

炎靈遺劒壘當塗駭龍戰聖期缺中壤霸功興寓縣鵠
起登吳山鳳翔凌楚甸衿帶窮巖險帷幕盡謀選北拒
溺駿鑣西龕收組練江海既無波俯仰流英眄乘冕類
禋郊卜葵崇離殿釣臺臨講閱樊山開廣讌文物共歲
壯聲明且葱蒨三光獻分景書軌欲同薦參差世祀忽
寂寞市朝變舞館識餘基歌梁想遺嚙故林衰木平荒
池秋草徧雄圖悵若茲茂宰深遐睠幽客滯江臯從賞

垂纓弁清危阻獻酬良書限聞見幸藉芳音多承風采
餘絢于役倘有期鄂渚同遊衍

夏始和劉潺陵

威仰弛蒼郊龍曜表皇隰春色卷遙甸炎光麗近邑白
蘋望已騁緗荷紛可襲徒願尺波旋終憐寸景戢對窗
斜日過洞幌鮮飈入浮雲去欲窮暮鳥飛相及柔翰鎮
芳塵清源非易揖迴江難絕濟云誰暢佇立良宰勗夜
漁出入事朝汲積羽余既裳更賦子盈粒猗梧何必零

歸來共棲集

新治北窗和何從事

國小暇日多民淳紛務屏闢牖期清曠開簾候風景決
決日照溪團團雲去嶺巒峯蘭橑峻駢闢石路整池北
樹如浮竹外山猶影自來彌弦望及君臨箕頰清文蔚
且詠微言超已領不見城壕側思君朝夕頃迴舟方在
辰何以慰延頸

和王主簿李哲怨情

掖庭聘絕國長門失歡宴相逢詠靡蕪辭寵悲團扇花
叢亂數蝶風簾入雙燕徒使春帶賒坐惜紅粧變生平
一顧重宿昔千金賤故人心尚爾故心人不見

和徐都曹出新亭諸

宛洛佳遨遊春色滿皇州結軫清郊路迴瞰蒼江流日
華川上動風光草際浮桃李成蹊徑桑榆蔭道周東都
已倣載言歸望綠疇

和劉中書

昔余侍君子歷此遊荆漢山川隔舊賞朋僚多雨散圖
南矯風翩翩曾非息短翰移疾覩新篇披衣起淵訖惆悵
懷昔踐彷彿得殊觀頽紫共彬駭雲錦相凌亂奔星上
未窮驚雷下將半迴潮漬崩樹輪囷軋傾岸巖篠或傍
翻石菌蕪脩幹澄澄明浦媚衍衍清風爛江潭良在目
懷賢興累歎歲暮不我期淹留絕巖畔

贈王主簿二首

日落牕中坐紅粧好顏色舞衣襞朱縫流黃覆不織蜻

嶺草際飛遊蜂花上食一遇長相思願寄連翩翼

清吹要碧玉調絃命綠珠輕歌急綺帶含笑解羅襦餘
曲詎幾許高駕且踟躕徘徊韶景暮一作憐惟有洛城
隅

和蕭中庶直石頭

九河亘積岨三峻巒旁眺皇州總地德回江欸巖徼井
幹葩蒼林雲甍蔽層嶠川霞旦上薄山光晚餘照翔集
亂歸飛虹蜺紛引曜君子奉神略瞰迴憑重峭彈冠已

籍甚升車益英妙功存漢冊書榮並周庭燎汲疾移偃
息董園倚談笑麾旆一悠悠謙姿光且劭讌嘉多暇日
興文起淵調曰余廁鱗羽滅景從漁釣澤渥資投分逢
迎典待詔詠洛邈含毫專城空坐嘯徒慚皇鑒揆終延
曲士誚方追隱淪訣偶解金丹要若偶巫咸招帝闇良
可叫

奉和竟陵王同沈右率過劉先生墓

嘉樹因枝條琢玉良可寶若人陵曲臺垂帷茂淵道善

誘宗學原鳴鐘霽幽抱仁焉徂宛洛清徽夜何早歲晚
結松陰平原亂秋草不有至言揚終滌西山老

和王長史卧病

碑岫欵崇崖派別朝洪河兔園文雅盛章臺冠蓋多淵
襟眷睿岳燮贊動忙歌顧影慚駢服載筆旅江沱縞衣
分可獻琴言暖已和青畢向還色春潤視生波巖垂變
好鳥松上改陳蘿日與歲眇邈歸恨積一作蹉跎願緝
吳山杜寧袂楚池荷清風豈孤劬功遂懷曾阿勿藥良

有暢往蕡芳未過幸留清樽味言藉故田莎

和江丞北戍琅邪城

春城麗白日阿閣跨層樓蒼江忽渺渺驅馬復悠悠京
洛多塵霧淮濟未安流豈不思撫劍惜哉無輕舟夫君
良自勉歲暮勿淹留

和沈祭酒行園

清淮左長薄荒徑隱高蓬回潮旦夕上寒渠左右通霜
畦紛綺錯秋町鬱蒙茸環梨懸已紫珠榴折且紅君有

棲心地伊我歡既同何用甘泉側玉樹望青葱

奉和隨王殿下十六首

高秋夜方靜神居肅且清閒階塗廣露涼宇澄月陰蟬
娟影池竹疎蕪散風林淵情協爽節詠言興德音閭道
空已積千直愧蓬心

星回夜未艾洞房凝遠情雲陰滿池榭中月懸高城喬
木含風霧行鴈飛且鳴平臺盛文雅西園富羣英芳慶
良永矣君王嗣德聲眷此伊洛詠載懷汾水情顧已非

麗則恭惠奉仁明觀淄詠已失憮然愧簪纓

神心遺魏闕中想顧汾陽肅景懷辰豫捐玦翦山揚時
惟清夏始雲景曖含芳月陰洞野色日華麗池光草含
亭皋遠霞生川路長端坐間鶴引靜瑟愴復傷懷哉泉
石思歌詠鬱瓊相春塘多迭駕言從伊與商袞職眷英
覽獨善伊何忘願輟東都遠弘道侍云梁

睿心重離析岐路清江隈四面寒飈舉千里白雲來川
長別管思地迴翻旗回還顧昭陽闕超遠章華臺置酒

巫山日為君停玉杯

桂樓飛絕限超遠向江岐輕寒霽廣甸微風散清漪連
連絕鴈舉渺渺青煙移嚴城亂芸草霜塘凋素枝氣夾
深遙矚豫永聊停羲即已終可悅盈尊且若斯

念深沖照廣業闡清化玄端儀穆金殿敷教藻瓊筵船
湛輕帷靄磬轉芳風旋卷轡棲道樹方津棹法舷歸興
憑大造昭塗良易筌

玄冬寂修夜天圍靜且閒亭臯霜氣愴松宇清風來高

琴時以思幽人多感懷幸藉汾陽想嶺首正徘徊

愴愴緒風興祁祁族雲布嚴氣集高軒稠陰結寒樹日
月謬論思朝夕承清豫徒藉小山文空揖章臺賦

肅景遊清都修簪侍蘭室累榭疎遠風廣庭麗朝日穆
穆神儀靜愔愔道言密一飧繫靈表無吝科年歷

清房洞已靜閒風伊夜來雲生樹陰遠軒廣月容開宴
私移燭飲遊賞藉琴臺風猷冠淄澗莊鳥愧唐枚

方池含積水明月流皎鏡規荷承日汎彫鱗與風泳上

善叶淵心止川測動性幸是方春來側點游濠盛

浮雲西北起飛來下高堂合散輕帷表飄舞桂臺陽遙
階收委羽平地如夜光眷言金玉照顧慚蘭蕙芳

炎光缺風雅宗霸振時淪龍德待雲霧令圖方再晨歲
遠荒城思霜華宿草陳英威遽如是徘徊歧路人

分悲玉瑟斷別渚金樽傾風入芳帷散缸華蘭殿明想
折中園草共知千里情行雲故鄉色贈此一離聲

年華豫已滌夜艾賞方融新萍時合水弱草未勝風閨

幽瑟易響臺迴月難中春物廣餘照蘭萱佩未窮

連漪映餘雪嚴城限深霧清寒起洞門東風急池樹神
居望已肅徘徊舉冲趣棲歸如遲詠丘山不可屢

和紀參軍服散得益

金液稱九轉西山歌五色鍊質乃排雲濯景終不測雲
英亦可餌且駐羲和力能令長卿卧暫故遇真識

和王中丞聞琴

涼風吹月露圓景動清陰蕙風入懷抱聞君此夜琴蕭蕭

瑟滿林聽輕鳴響澗音無為澹容與蹉跎江海心

將發石頭上烽火樓

徘徊戀京邑躡躅驪曾阿陵高遲闊近眺迴風雲多荆
吳阻山岫江海含瀾波歸飛無羽翼其如離別何

望三湖

積水照赬霞高臺望歸翼平原周遠近連汀見紆直歲
艸向春秀芸黃共秋色薄暮傷哉人蟬媛復何極

送江水曹還遠館

高館臨荒途清川帶長陌上有流思人懷舊望歸客塘
邊草雜紅樹際花猶白日暮有重城何由盡離席

送江兵曹檀主簿朱孝廉還上國

方舟泛春渚攜手趨上京安知暮歸客詎憶山中情香
風葢上發好鳥葉間鳴揮袂送君已獨此夜琴聲

臨溪送別

悵望南浦時徙倚北梁步葉上涼風初日隱輕霞暮荒
城迥易陰秋谿廣難渡沫泣豈徒然君子行多露

後齋迴望

高軒瞰四野臨牖眺襟帶望山白雲裏望水平原外夏
木轉成帷秋荷漸如益翠洛常睠然搖心似懸旆

與江水曹至干濱戲

玉臺云別
江水曹

山中上芳月故人清樽賞遠山翠百重迴流映千丈花
枝聚如雪蕪絲散猶網一作垂藤
散似網別後能相思何嗟異

封壤

答沈右率諸君餞別

春夜別清樽江潭復為客歎息東流水如何故鄉陌重
樹日芬蕡芳洲轉如積望望荆臺下歸夢相思夕

離夜同江丞王常侍作

玉繩隱高樹斜漢耿層臺離堂華燭盡別幌清琴哀翻
潮尚知限客思耿難裁山川不可夢况乃故人杯

祀敬亭山廟

翦削魚太華崢嶸跨玄圃貝闕眠阿宮辟帷陰網戶參
差時未來徘徊望澧浦椒糈若馨香無絕傳終古

出下館

麥候始清和涼雨銷炎燠紅蓮搖弱荷丹藤繞新竹物色盈懷抱方駕娛耳目零落既難留何用存華屋

落日同何儀曹煦

參差複殿影氛氲綺羅雜風入天淵池芰荷搖復合遠聽雀聲聚回望樹陰杳一賞桂尊前寧傷蓬鬚颯

夜聽妓二首

瓊閨釧響聞瑤席芳塵滿要取洛陽人共命江南管情

多舞態遲意傾歌弄緩知君密見親寸心傳玉盃

上客光四座佳麗直千金挂釵報纓絕墮珥答琴心蛾眉已共笑清香復入襟歡樂夜方靜翠帳垂沈沈

詠薔薇

低枝詎勝葉輕香幸自通發萼初攢紫餘采尚霏紅新花對白日故益逐行風參差不俱曜誰肯盼微叢

詠蒲

離離水上蒲結水散為珠間廁秋菡萏出入春鳬雛初

萌實雕俎暮蕡雜椒塗所悲塘上曲遂鑠黃金軀

詠兔絲

輕絲既難理細縷竟無織爛熳已萬條連綿復一色安
根不可知萦心終不測所貴能卷舒伊用蓬生直

遊東堂詠桐

孤桐北牕外高枝百尺餘葉生既婀娜葉落更扶疎無
華復無實何以贈離居裁為珪與瑞足可命參墟

雜詠三首

鏡臺

玲瓏類丹檻苔亭似玄闕對鳳懸清冰垂龍挂明月照
粉拂紅粧挿花理雲髮玉顏徒自見常畏君情歇

燈

發翠斜漢裏蓄寶宕山峰抽莖類仙掌銜光似燭龍飛
蛾再三繞輕花四五重孤對相思夕空照舞衣縫

燭

杏梁賓未散桂宮明欲沈暖色輕帷裏低光照寶琴徘徊

徊雲髻影的爍綺疏金恨君秋月夜遺我洞房陰

同詠樂器得琴

洞庭風雨幹龍門生死枝雕刻紛布濩沖響鬱清危春
風搖蕙草秋月滿華池是時操別鶴淫淫客淚垂

同詠坐上玩器得烏皮隱几

蟠木生附枝刻削豈無施取則龍文鼎二趾獻光儀勿
言素韋潔白沙尚推移曲躬奉微用聊承終宴疲

同詠坐上所見一物得席

本生潮汐池落景照參差汀洲蔽杜若幽渚奪江蘿遇君時采擷玉座奉金卮但願羅衣拂無使素塵彌

詠竹火籠

庭雪亂如花井冰粲成玉因炎入貂袖懷溫奉芳褥體密用宜通文邪性非曲本自江南墟娟娟修且綠暫承君玉指請謝陽春旭

詠風

徘徊發紅萼歲艱動綠旆垂楊低復舉新萍合且離步

檐行袖靡當戶思襟披高響飄歌吹相思子未知時拂
孤鸞鏡星鬟視參差

詠竹

牕前一叢竹青翠獨言奇南條交北葉新筍雜故枝月
光疎已密風來起復垂青扈飛不礙黃口得相窺但恨
從風籜根株長別離

詠落梅

新葉初冉冉初茲新菲菲逢君後園燕相隨巧笑歸親

勞君玉指摘以贈南威用持挿雲髻翡翠比光輝日暮
長零落君恩不可追

詠牆北梔子

有美當階樹霜露未能移金黃發朱采映日以離離幸
賴夕陽下餘景及西枝還思照綠水君階無曲池餘榮
未能已晚實猶見奇復留傾筐德君恩信未貲

詠鴻鵠

蕙草含初芳瑤池曖晚色得廁鴻鸞影睇光弄羽翼

聯句

阻雪連句遙贈和

積雪皓陰池北風鳴細枝九達密如繡何異遠別離

謝朓

風庭舞流霰冰沼結文潮飲春雖以燠欽賢紛若馳

江秀

才珠霰條間響玉溜檐下垂杯酒不相接寸心良共知

王丞
融

飛雲亂無緒結冰明曲池雖乖促席謙白首信勿

虧僧孺

飄素瑩簷溜巖結喧通岐轉疊如未幹况乃

限音儀

謝洗

原隰望徒倚松筠竟不移隱憂恧萱樹忘

馬吳

懷待山危

劉中書繪初昕逸翮舉日昇駕馬疲幽山有桂樹

歲暮方參差

沈右率約

還塗臨渚

綠水纈清波青山繡芳質落景皎晚陰殘花綺餘日

何從

事白沙澹無際青山眇如一傷此物運移惆悵望還律

吳郎白水田外明孤嶺松上出即趣佳可淹淹留非下秩

府君
追和

紀功曹中園

蘭亭仰遠風芳林接雲萼傾葉順清飈修茲佇高鶴

何從

事連綿夕雲歸掩暖日將落寸陰不可留蘭墀豈停酌

吳郎丹纓猶照樹綠筠方解籜永志能兩忘即賞謝丘壑

君府

閒坐

雨洗花葉鮮泉漫芳塘溢藉此閒賦詩聊用蕩羈疾

陳郎

肅霖微雨散歲蕤蕙草密預藉芳筵賞沾生信昭悉

紀功

曹晏紫葵牕外舒青荷池上出既闔頽川扉且卧淮南秩

君府流風蕩晚陰行雲掩朝日余此蘭蕙客徒有芳菲質
何從事

侍筵西堂落日望鄉

沈病已綿緒負官別鄉憂高城淒夕吹時見國烟浮

曹丞

漠漠輕雲晚颯颯高樹秋鄉山不可望蘭卮且獻酬

府君

旻高識氣迥泉渟知潦收幸遇慶筵渥方且沐恩猷

紀功

晏芸黃先露早騷瑟驚暮秋舊城望已肅況乃客悠悠

曹何從事

往敬亭路中

山中芳杜綠江南蓮葉紫芳年不共遊淹留空若是

府君

綠水豐漣漪青山多繡綺新條日向抽落花紛已委

何從

事弱蔓既青翠輕莎方露靡鷺鷗沒而遊腐麌騰復倚

齊舉春岸望沈沈清流見瀾瀾幸藉人外遊盤桓未能

徙

陳郎驚怛把瓊芳隨山訪靈詭榮循每嶙峋林堂多琦

磯

府君

祀敬亭山春雨


水府衆靈出石室寶圖開白雲帝鄉下行雨巫山來
君府
歌風讚靈德舞蹠起輕埃高軒乍留吹元羽或徘徊

從何

事福降羣仙下識逸百神該青鳥飛層隙赤鯉泳瀾隈



漢魏六朝百三家集卷七十七



總校官庶吉士臣侍朝

校對官庶吉士臣陳文樞

謄錄舉人臣呂燕昭